

■ Verabschiedung von Prof. Manfred Nagl am 26. Juni 2009

Ei gunn Dach!

Senn ihr also aa do! Senn ihr aach komm weje dem Manfred? Es hädd mich aach gewonnerd wenn ihr ned komm wäre, ihr Freibergergeschidder. Awwa halb so schlemm, ich bin desweje jo sogar extra von Saabrigge dohergefahr.

Also verdient haddas jo, der Manfred. Wann a blos nedd so e komische Vornahme han dähd. „Manfred?!“: Das bassd jo eijendlich nur for e Opel-Manta-Fahrer, der wo medda Frisös eromscharwenzelt. Awwa Opel es jo bankrodd unn unsa Manfred däd im Löwe(!) kä Opel fahre.

Weil: de Manfred ess jo absoluter BMW-Friehg; von so emme meddelgroße Schilddie. Die diggschd BMW-Sord hädda villeicht gäre, awwa das kann sich e Informadikprofessor heidsedachs jo nemme leischde.

Wann ihr ana Fähla mache wolle, dann misse ihr mem Manfred e Geschbräch iwuer Audos ahnfange. Dann hann ihr nämlich en der nägschd halb Stonn nix meh se lache. De Manfred werd eich dann vagligger wie gudd sei Auto ess unn vor allem wie wenisch das verbrauche duhd. Neilisch ess er off das schmale Bredd komm unn had uns vazehld, er wär noh Niernbersch gefahr unn bei Erlange hädda Schbritt ablosse misse, sonschd wär de Tank (wo in Aachen halb lähr gewehn wär) nämlich weje Iwuerfüllung geplazd.

Ich hann jo seit korzem aach so e alder (awwa zwei Nummere kläänera) BMW faschd geschengd kredd. Med der Abwrackprämie kennd ich jedzd noch e beachdliches Geschäfd mache. Awwa ich muss sahn, dass ich in punkto Verbrauch de Manfred ned beschdädische kann. Ich wird liewa sei abgelossener Schbritt bei mir zoggä, weil meiner sauft noch meh Benzin wie ich Bier gesoff han vor meim Zoggä. Ach so: Proschd allerseits. Ich wölld extra **Saarfirschd Bereiche** medbringe – wo jeder kennd der wo emol en Dagstuhl war unn was maschd nergens off da Welt kriehn kann. Awwa die senn bangrodd weil de Manfred in Dagstuhl ned genuch devonn gedrung had. Desweje hann ich misse die nei Sord „Zischke“ als Ersatz medbringe, awwer das zischd jo villeicht sogar besser.

E anneres Beischbiel for ebbes ned so Exagdes beim Manfred: Wanna sahd „Nur ein Halbsatz dazu“, dann kenne ihr ruhisch erausgehn unn e Tass Kaffee dringe. Vor acht Minudde nämlich ess der Halbsatz bestimmt net zu Enn.

Ei jo, er flunkerd hald als emol e bisje, unsa Manfred. Awwa er es doch e feina Kerl. Unn ihr werre eich noch schwer(!) wonnere wann der emol nemme jede Daach do ess.

Was had de Manfred ned alles for die Combjuderei in Aache gemachd! Wenn ich Eich das alles ferzehe dähd, dann misse ma e Nachdschicht enleje. Desweje muss ich mich „aus Zeidgrinde“ off ähnzisches Hochlicht oder Highlight (wies fornäher of Englisch heischd) beschränke, nämlich off sei **SFB**. Do esser jo besonnerschd schdolzt droff. On zwar med Recht!

Also SFB! Das es e Abkerzung for „Sie forze bloo“. Wie: Duhn Ihr das ned verstehn? „Blooforme“ heischd soviel wie blaumache. Unn das hann viel Leit en dem SFB gemachd.

Wie had der eijendlich noch geheischd, der SFB? Irjendwas med IMM. „Impuls“ oder „Im Puff“ (nä das war jetzd e bisje polidisch falsch oder inkorregd). Wie war jedz awwer nochemol der Name: „Im.“, „Im.“, „...“?

Jedzd hannichs: „Impruuv“ war de Name. Med zwei „u“ unn med Vogel-Fau.

Om was es do gang es, das wäas ich nemme so genau, jedefalls had ma stonne-, monade- unn johrelang iwua Prozess-Produktmodelle geschwätzd. Ich hann dodefonn jo nedd soviel verschdann, awwer ich han mich emmer gewonnerd, dass zeerschd der Prozess komm es unn dann erschd das Produkt, wobeil nadierlich nie e Produkt erauskomm ess. Soviel nur näwebei.

War jo aach klar: Bevor ma sich das ganze Drama (odda wie ma in Oche saahd: där janze Driss) meddeme konkrete Produkt ahnduhn duhd, ess es jo viel angenäher, vorher offzeheere unn stattdesse e annerie Bauschdel offzemache. Dann kamma viel wenischer kritisiert werre, wenn das Produkt ned so fungsjonierd als wie wo mas seerschd grosmeilich verschbroch hat. So machd ma das enn da Informadik jo permanent.

Iwuerhaubd ess die Prozess-Produkterei e groða Kabbes unn had med da Realidä wensch se duhn. „Zuerschd der Prozess unn dann das Produgd“ had de Manfred emma gesahd. Aber in Wergleichid es es doch genau omgekehrd: Zuerschd kommt es Produgd on dann meischdäns de Prozess. Wie soll ich eich das vagligger? Villeicht so: Ahngenomm, ihr mache jemand e Kend, weil die Spezifigadzion odda meineweje es Condominium ned perferd gebassd hat. Dann es das Kend jo quasi das Produgd. Onn dann kriehn ihr **noher** (awwa ned vorher!) de Prozess an de Hals, wann ihr kä Alimende zahle duhn. So ähnfach es das.

Im SFB han se so ähnfache Argumendadzjone awwa parduh ned verschdehn wolle – unn ich hann aach ned gemeggerd, weil ich mir hald gedengd han: „Oh geh fott, loss se doch mache, was se wolle. Bevor ich mir noch siebzeh annerie Halbsatz anheere muss...!“.

En dem SFB ess es awwa aach om annerie Sache gang, zum Beispiel om **Polyamid-6**. Das ess so e Zeich, das wo ma angeblich fier Damestrimp brauche kenne däd. Ich hann awwa nie Damestrimp em SFB gesiehn, ned emol bei da Frau Baier, die wo im SFB ganz schehn Karriere gemachd hat. Die hat nämlich emmer e Hoserock angehad.

Unn dann hads aach Dinger gebb wie **Ein-Schnecke-Extrudere** odda Schemakorrespondenzeditore. De Extruderer hamma kerperlich gesiehn. Das war so e handelsieblicher Fleischwolf, blos viel viel deiler; irjendwo muschde jo die SFB-Middel schließlich hin. De Schemakorrespondenz-editor unn anere Ungetieme konnd ma leider nedd siehn. Zum Glick nedd!

Ich menn jo nur: De Editor hädd ma siehn kenne, villeicht aach de Korrespondenzeditor (das wär dann beispielsweise de Peter Scholl-Latour). Awwa beim **Schemakorrespondenzeditor** had dann die Phantasie nemme medgemacht. Ess villeicht aach besser so.

Unn viele annerie Sache hamma aach nie gesiehn wie zum Beispiel: „**Integratorahmenwerksbasierte Korrespondenzanalysergele**“ odda „**metamodellerweiterte Softwareentwicklungsumgebungen**“.

Om nur emol zwei se nenne.

Die meischde konkrete Sache wie der Fleischwolf, die senn jo vom Maschbau komm. Odde von der Verfahrenstechnik. Nomen est omen, wie der Ladeiner sahd: Der Karre war **verfahr**, nur die DFG hads hald ned gemergd.

De Manfred had als Schbrecher schdradegisch gewirgd unn vor allem unendlich fier Bildscher gemohld. Lauder Rechtecke unn Ovale, unn dodezweise nix wie Pfeile hin unn her. Ich wäs jo ned, ob ihr Eich das vorstelle kenne, wie so ebbes ausgesiehn had.

Awwa fielleichd war jo der ähne oder annerer von eich schon emol in Brüssel oder genauer gesahd in Waterloo, wo de Napoleon domols schwer ana off die Wutz kredd had. In Waterloo senn so Tafele med Laacheplän offgeschdelit, wo die ganze Regimenta vom Blücher, vom Wellington unn vom Napoleon engetraa senn – inklusive Kavallerie, Artillerie unn so. Onn nadierlich zusamme med jeda Menge Pfeile, die wo die Bewehschunge von dene ähnselne Abdeilunge dargeschdelit han.

So ähnlich hann em Manfred sei Bildscha aach ausgesiehn unn wenn ma ne noch e bisje gewähre gelossd hädd, dann hädd de Napoleon in Waterloo villeicht noch gewonn unn Aachen würd dann widda Aix-la-Chapelle heische unn wär goddeidank noch bei Frankreich em Département Roer so wie schon Siebzehnhunderdachteneinzig. Onn mir em Saarland wäre em Département Sarre oder als Pälzer em Département Mont-Tonnerre (also Donnersbersch). Es ess werklisch zu schad, dass de Manfred ned domols schon sei Bildscher mole konnd. Die Weldgeschichd wär annerschda verlaaf.

Was mir von Informadig vier em SFB gemachd han (ich war jo domols noch bei Eich unn bin schbäda widda in mei ald Heimad no Saabrigge gezoh), das wäas ich gar nemme. Ich kann mich bloß noch erinnere, dass mir bei da Begehung dorch Schduhnikluscherei de Schdrom-schdecker erausgezoh hann unn die miehsam sesamme-geknoddelde Demonshdratation beinägtschd zum Abschdurz gebrung hann. Das war awwa aach e totali beknagddie Demo: „**Gunn Dach, Herr Trennexperte, ich bin die Reaktionsexperten. Was meint denn der Fließbildexperte?**“ Unn so weida unn so fort. Jeder vernünftische Mensch had soford gesiehn, dass e Firma, die wo so beschdusdde Midarbeider hat, im Nullkommanix bangrodd gehn muss. Villeicht senn die Firma aach desweje kabudd gang, weil se die Sache vom SFB irrtiemlich engesetzd han unn der SFB es jetzd aach noch schold an der Wirtschafskrise.

Awwa das wär jädzd dann doch zuviel schbeguliert unn zuviel von dem Guddde (Lioner, der wo ich aach medbrung hann).

Proschd, Manfred - unn nix for ungudd.

Aachen, 26. Juni 2009 Otto Spaniol